

Father Tom:

Un lider spiritual y un gran ser humano

Skirbi pa Jenny Cratz

Na momento cu mi a topa Father Tom pa prome bez, Aruba tabata pasa den momentonan dificil. E tabata den e temporada cu Aruba tabata prepara pa despedi di Lago y acepta su Status Aparte. Father Tom a bira Pastor di Brazil, un barrio caminda hopi hende tabata depende di e cantidad di cuponan di trabao cu Lago directamente of indirectamente tabata genera. Iglesia den e temporada tabata pasa tambe den un fase di cambio cu entrada di hopi cara nobo cu a bira activo, manera tabata e caso cu mi mes.

Pa hopi hende, sigur e tempo, sacerdotenan tabata hendenan "fuera di e mundo aki". For di momento cu a acerca un sacerdote of un Pastorie, tabata manera tabata drenta un planeta cu no tabata mundo. E acercamento mas estrecho entre Sacerdote y Pueblo, tabata den un fase importante.

E prome bez cu mi a worde ricibi pa Father Tom, el a saluda mi cu un sonrisa y cu braza habri. For di un bleki, el a produci buscuchi cu nos a saborea cu cofi, prome cu el a puntrami ta kico a hibami Pastorie di Brazil. Asina nos amistad a cuminsa. Mi ta usa e palabra "amistad" pasobra e relacion entre Father Tom y esnan cu tabata rondone tabata caracteriza su mes pa "amistad" cu el a subraya como un valor grandi.

Generosidad, cortesía tabata palabranan cu a haya bida cerca Father Tom. E cantidad di persona, cu tabata bishite, tabata enorme. Hobennan tambe a cuminsa haya caminda pa Misa y sigur pa cas di Father Tom, cu tabata yen di sorpresa.

Mi no por lubida e Diasabra cu nos a worde introduci na cushina Filipino. E ingredientenan necesario mester a worde busca. Pisca yena, lora den foyo di banana y herbi den coco raspa.

Fiesta di Cristo Rey sigur ta un Fiesta importante. Como Paroquia di Brazil ta Paroquia di Cristo Rey, e fiesta di Patrono tabata algo grandioso. Despues di Misa tur hende a reuni na cas di Father Tom, pasobra ta asina un Paroquia como comunidad ta celebra su fiesta.

Awor un hende lo pensa cu Father Tom tabata



un persona cu tabata tin na prome lugar, actividad social na mente. E contrario tabata berdad. Pa Father Tom, Paroquia ta un comunidad. Pesey den fin di siman, e tabata urgi tur hende pa bay Misa na nan Paroquia y pa nan yuda edifica nan Paroquia hunto cu nan familianan.

Si hopi advertencia cu Father Tom tabata lanza e tempo, a worde warda den curazon, for di ayera lo a evita hopi problema cu nos conoce awe. E vision cu Father Tom tabata tin di hopi desaroyo, cu tabata bay robez na su parecer, y e forma cu e tabata para firme pa loke ta Berdad y ta eror, tabata duna contenido na loke por yama un "voz profetico".

Father Tom tabata traduci Evangelio den Bida di Awe. E tabata tene su mes na loke mester a worde bisa y no na complacencia. Pa por a realiza su trabao, e tabata tin mester di tur hende. Di esnan den politica tambe. Pero nan no por a bira su midi.

Bida no tabata facil pa Father Tom. Problemanan di salud a cuminsa manifesta. E no tabata reclama. E tabata acepta, aunke un of otro palabra tabata demostra su preocupacion. Pero e tabata mas preocupa pa loke e tabata mira na caminda y den hopi conversacion di 10 aña pasa, ya Father Tom a describi loke awe ta socede. E no tabata clarovidente, pero simplemente realistico. Su principio tabata, cu unabez bo cuminsa entrega, bo ta keda man bashi.

Father Tom tabata tin interes pa tur loke tabata Aruba. E tabata kere cu mester a planta mas mata pa asina por haya mas awacero. Un conocimiento cu el a trece cune for di Filipinas, cu a regala Aruba Father Tom pa un tempo.

Ora el a regresa su pais, ya Father Tom tabata conciente di su problemanan

di salud. Aruba tabata tuma nota con e tabata perde su vista. Con e final tabata acerca na un forma sumamente dificil y angustioso.

E ultimo parti di su Mision, Father Tom a pasa entrega completamente na su fe, den cercania di hasta peligro di volcan. Siman pasa, dolor a termina. Tomas Aquino Robrigado, a despedi pa bay presenta dilanti Cristo

Rey, Esun cu el a sirbi.

E anuncio di su fayecimento a plama rapidamente. Father Tom a bay pa semper. El a bay su destino. E no ta worde lubida. Loke si ta di lamanta ta, cu no a skirbi tur loke e tabata bisa pa awe nos realiza, cu loke e tabata bisa nos, tras di e copi di cofi, den cushina di Pastorie, den Misa, ta e raiz di tanto problema cu nos no por solucionar!